

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. NCR थमां माता वैष्णो देवी दी जातरा लेई औने आहले श्रद्धालुएं लेई मती राहत, गाजियाबाद थमां जम्मू लेई डोआरी रम्भ।
2. उधमपुर ताईं ब्हाई राबते लेई भारतीय एयरपोर्ट अथारिटी AAI नै जमीनी समीक्षा गितै पैनल बनाया।
3. डोडा जिले च बलें आतंकवादियें दे छप्पने आहले इक ठिकाने गी नष्ट करियै हथियार ते गोला बरूद बरामद कीता।
4. मुख् सचिव अटल डुल्लू होरें'गी न्यूज-18 सम्मेलन 2025 च मन्ने-परमन्ने दे डायमंड स्टेट्स अवार्ड्स कन्नै सम्मानित कीता गेआ।
5. जम्मू-कश्मीर दी पैरालंपियन तीरंदाज शीतल देवी नै खेलो इंडिया पैरा गेम्स 2025 च सुन्ने दा तगमा जितेआ।

<><><><><><>

Jammu-Hindon Flight

गाजियाबाद दे हिंडन एयरपोर्ट थमां जम्मू लेई ब्हाई सेवा अज्जै थमां रम्भ होई गई ऐ। हिंडन ब्हाई अड्डे थमां जम्मू लेई पहली डोआरी बड्डलै साड्डे 9 बजे रवाना होई। आकाशवाणी दे जम्मू संवाददाता नै खबर दिती ऐ जे एनसीआर थमां माता वैष्णो देवी मंदर जाना हुन मता सखल्ला

होई गेआ ऐ कीजे हुन यात्रुएं गी जम्मू जाने ताई दिल्ली एयरपोर्ट जाने दी कोई लोड़ नेई होग। सगुआं उन्दे कश एनसीआर थमां ब्हाई जातरा दा इक होर विकल्प उपलब्ध होग। जम्मू थमां हिंडन लेई डोआरी दपैहरी 1 बजे होग जेड़ी डेढ घंटे परैंत ढाई बजे हिंडन पुज्जी जाग। यात्रुएं दी सहूलत ते किफायती कराएं भाड़ें च ए.आई.आर इंडिया एक्सप्रेस गाजियाबाद दे हिंडन ते जम्मू बश्कार हफते च 6 ध्याड़े शनिवारै गी छोड़ियै डोआरियां संचालित करोग।

<><><><><><>

Udh. All

उधमपुर जिले गी ब्हाई संपर्क दी तजवीज दे मददेनजर भातरीय एयरपोर्ट अथारिटी नै इक्क कमेटी खडेरी ऐ जेड़ी जमीनी हालात दी समीक्षा करोग। आकाशवाणी दे जम्मू संवाददाता नै दस्सेआ ऐ जे ए.ए.आई नै जहाजें दे खेतर ते ब्हाई सेना दे माहिरें दे कन्नोकन्नी पेशेवर पायलटें दी इक कमेटी दा बी गठन कीता ऐ जेड़ी अगले हफते दे खीरै तगर उधमपुर दा दौरा लाग। एह कमेटी प्रधानमंत्री हुंदे दफतरै च केंद्री राज्यमंत्री डॉ. जितेंद्र सिंह हुंदे प्रस्ताव दी अमलावरी पर बचार विमर्श करोग। श्री सिंह होरें हिंडन जम्मू डोआरी गी उधमपुर तगर बदाने पर विचार करने गितै आखेआ ऐ जेदा मकसद यात्रुएं गी सहूलतां पजाना ऐ। ध्यानजोग ऐ जे डॉ. सिंह होरेंगी लोकें पासेआ उधमपुर गी जम्मू रस्तेया दिल्ली कन्ने जोड़ने दियां अपीलां हासल होइयां हियां।

<><><><><><>

Doda-Hideout Busted

डोडा जिले दे दूर-दरेडे जांगली इलाके च बलें आतंकवादियें दी इक छप्पने आहली थाहर दा पता लाइयै इक्क पस्तौल ते किश गोला-बरूद बरामद कीता ऐ। आकाशवाणी दे जम्मू संवाददाता नै दस्सेआ जे डोडा जिला च भद्रवाह दे भालरा जांगली इलाकें च मकामी पुलिस ते सेना दे अभिजानें सरबंधी टकोहदे गुप एस.ओ.जी आसेआ सांझे तपाशी अभियान दौरान इस ठकाने दा पता लग्गा।

ठिकाने थमां इक्क पस्तौल, औदियां 3 मैगजीनां ते रौंदें सनें ए.के असाल्ट रफल दे 25 रौंद बरामद कीते गो। शुभे आहली नक्लो हरकत दी रिपोर्ट परेंत इक्क टकोहदी सूह दी बिनाह पर चलाए गेदे अभिजान दौरान कुसै गी अजे हिरासतै च नेई लैता गेआ ऐ। तोआई, अधिकारियें दस्सेआ जे पुलस, सेना ते सी.आर.पी.एफ आसेआ कन्नै लगदे किशतवाड़ जिले दे गुरीनाल, ठाठरी ते छात्रु जंगल च बी सांझा तपाशी अभियान चलाया जा करदा ऐ। किश मकामी लोकें आसेआ वीरवारें उप्परले इलाकें च आतंकियें दी मौजूदगी बारे सूचना सांझा करने परेंत एह अभियान रम्भ कीता गेआ हा। इस सरबंधे च होर जानकारी गी बलगेआ जा करदा ऐ।

<><><><><><>

CE Project Sampark Visit

प्रोजेक्ट संपर्क दे चीफ इंजीनियर ब्रिगेडियर नीरज मदान होरें राजौरी-पुंछ जिलें च बड्डे शिड़क ढांचागत परियोजनाएं दे सरबंध च 3 दिनें दा दौरा लाइयै तफसीली निरीक्षण कीता। आकाशवाणी जम्मू संवाददाता नै दस्सेआ ऐ जे 31 बार्डर रोड्स टास्क फोर्स दे कमांडर, 58 ते 79 आर.सी.सी दे कमांडिंग अफसरें कन्नै ब्रिगेडियर होरें राजौरी-थन्नामंडी-सूरनकोट शिड़क, अखनूर-पुंछ जरनैली शिड़क ते पुंछ रावलकोट शिड़क दा दौरा लाया।

<><><><><><>

Reasi Water Rafting

जियां-जियां गर्मी बढदी जा रदी ऐ रोमांच प्रेमी चनाs दरेआ च व्हाईट वाटर राफ्टिंग दा नन्द ठोआने ताई रियासी दा रूख करा करदे न। इलाके दी कुदरती खूबसूरती ते इस रोमांचकारी खेड्ढ नै ना शड़ा सैलानियें सगुआं मकामी लोकें दा ध्यान अपनी बक्खी खिच्चेआ ऐ। मैहकमा सैलसफा मकामी संचालकें कन्नै रलियै इक सुरक्षित ते रोमांचक राफ्टिंग लेई पूरी चाल्ली तैयार ऐ।

सिखलाई हासल पेशेवर सुरक्षा गी यकीनी बना करदे न। खेड्ठ दी बदा'रदी लोकप्रियता बारै बोलदे होई इक्क मकामी संचालक नै आखेआ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

CS-Award

जम्मू-कश्मीर यू.टी आस्तै बड़े माने आहली गल्ल ऐ जे मुख सचिव अटल डुल्लू होरेंगी अज्ज प्रतिष्ठित Diamond States सम्मान कन्नै Diamond States सम्मेलन 2025 दे गैंड फिनाले च नवाजेआ गेआ ऐ। एह सम्मेलन न्यूजी 18 तरफा आयोजित कीता गेआ हा। एह सम्मान न्यूज 18 दे प्रबंधन संपादक ज्योति कमल होरें जम्मू-कश्मीर दे प्रशासन, विकास ते लगातार नमी गैंड पुट्टने दे खेतर च पिछले कई बरें च मिसालजोग प्रदर्शन आस्ते दिता गेआ ऐ। एहदे पर मुख

सचिव होंरें आभार जताया ऐ ते इस सम्मान गी जम्मू-कश्मीर दे लोकें ते प्रशासन दे इकजुट कोशिशें गी समर्पित कीता ऐ।

<><><><><><>

Dy CM Martyrs Day

उपमुखमंत्री सुरिंद्र चौधरी होंरें स्वतंत्रता सेनानी शहीद भगत सिंह, राजगुरु ते सुखदेव होंरेंगी कठुआ दे रामलीला मैदान च आयोजित इक कार्यक्रम च भावें भरोची श्रद्धांजलि भेंट कीती। एह कार्यक्रम सारी राजनीतिक पार्टिएं ते समाजिक संस्थाएं मानवतावादी मंच कठुआ दे बैनर हेठ आयोजित करवाया। इस मौके साबका सांसद चौधरी लाल सिंह, साबका मंत्री डॉ. मनोहर लाल शर्मा, नेशनल कांफ्रें दे प्रांतीय प्रधान रत्न लाल गुप्ता ते दुए मन्ने-परमन्ने दे मकामी लोक मौजूद हे ते सारें भगत सिंह ते महान सपूतें गी श्रद्धांजलि भेंट कीती। उपमुखमंत्री सुरिंद्र चौधरी होंरें इस मौके बोलदे होई आखेआ।

<><><><><><>

Udh. Martyrs Day

महान स्वतंत्रता सेनानियें भगत सिंह, राजगुरु ते सुखदेव गी उन्दी शहादत आहले ध्याड़े अज्ज श्रद्धांजलि देने आस्तै उधमपुर च बक्ख-बक्ख संगठनें नेकां कार्यक्रमें दा सरिस्ता कीता। भगत सिंह यादगार कमेटी उधमपुर नै शहीद भगत सिंह पार्क गोल मार्किट उधमपुर च इक्क टकोहदे पुष्पांजलि कार्यक्रम दा सरिस्ता कीता जित्थें समाज दे सब्बै वर्गें दे लोकें देसै दे महान नायकें गी चेता कीता। इस मौके बोलदे होई भगत सिंह यादगार कमेटी दे प्रधान हाजी गुलाम रसूल होंरें आखेआ।

तोआई, राजौरी दे सुंदरबनी च सदगुरु बाबा कांशी गिरी जी चैरीटेबल ट्रस्ट बनपुरी सुंदरबनी आसेआ अज्ज बलिदान दिवस दे मौके पर इक रक्तदान शिविर दा सरिस्ता कीता गेआ।

<><><><><><>

Para Games Sheetal Gold

17एं बरें दी बरेसू आहली पैरालंपियन शीतल देवी नै अज्ज नमीं दिल्ली दे ज्वाहर लाल नेहरू स्टेडियम च खेलो इंडिया पैरा गेम्स 2025 च महिला कंपाउंड मकाबले च सुन्ने दा तगमा जितेआ हा। 2024 पैरिस पैरालंपिक च कैंस दा तगमा ते पैहले खेलो इंडिया पैरा गेम्स च सुन्ने दा तगमा जितने आहली शीतल नै फाइनल च 137 अंक हासल करियै पहली थाहर अपने नां कीती। पैरा तीरंदाज शीतल नै ओडिशा दे बोलनगीर दी पायल नाग गी हराइयै सुन्ने दा तगमा जितेआ। शीतल नै महिला कंपाउंड फाइनल च 129 अंक हासिल कीते। सेमीफाइनल च शीतल नै 140 अंक जिल्ले के पायल नै 139 अंक हासल कीते।

<><><><><><>

Udh. Volley Ball

जिला उधमपुर दे नौजोआनें गी इक्क मंच उपलब्ध करोआइये उनेंगी सेहतमंद जीन जीने ते नशीली दवाइयें दे गलत इस्तेमाल गी रोकने दे मकसद कन्ने जिला पुलस उधमपुर नै सरकारी मिडल स्कूल गढ़ी च वालीबॉल टूर्नामेंट दा सरिस्ता कीता गेआ जेदे च जिले दे बक्ख-बक्ख इलाकें दे नौजवानें हिस्सा लैता। इस मौके बतौर मुख परौहने उत्थे मौजूद डीएसपी मुख्यालय प्रहलाद कुमार होरें खडारियें दी खेड्ढ भावना दी तरीफ कीती। टूर्नामेंट च हिस्सा लैने आहिलियें टीमें च ईनाम बी तकसीम कीते गे।

<><><><><><>
